

‘Gerakan Cintailah Bahasa Kita’

Akhbar, radio dan TV jadi saluran utama sampaikan mesej

10 DEC 1987

KUALA LUMPUR 9 Dis. — Akhbar, radio dan TV akan menjadi saluran utama menyampaikan mesej - mesej “Gerakan Cintailah Bahasa Kita” yang akan dilancarkan secara rasmi oleh Perdana Menteri, Datuk Sri Dr. Mahathir Mohamad, Jumaat ini. Gerakan itu yang telah bermula 1 Disember lalu dan berakhir 30 April tahun depan akan memuatkan berbagai rancangan mengenai bahasa di media berkenaan, selain daripada selingan - selingan di pawagam - pawagam tempatan. Jurucakap urusetia gerakan itu memberitahu, majlis pelancarannya yang

dianggap kemuncak gerakan itu yang berlangsung di Hotel Shangri-La di sini akan disiarkan secara langsung oleh RTM dan juga TV3. “Di samping itu terbitan khas ruangan bahasa Malaysia di dalam semua akhbar tentang berbagai maklumat yang berkaitan dengan gerakan ini akan disiarkan,” ujarnya. Pada 12 Disember, kuiz bahasa Malaysia melalui radio di semua rangkaian dan stesen akan diadakan dan pada 13 Disember pula ceramah umum mengenai bahasa Malaysia oleh Ketua Menteri Sabah, Datuk Pairin Kitingan akan disiarkan. Pada 15 Disember, Ketua Menteri Sarawak, Datuk



Patinggi Taib Mahmud akan muncul di TV dengan ceramahnya pula, diikuti dengan debat perdana di RTM pada 17 Disember.

Satu lagi forum mengenai penggunaan bahasa Malaysia di TV akan disiarkan pada 23 Disember. Ia menyentuh

pandangan tokoh - tokoh perniagaan, perindustrian, media massa dan sektor swasta.

Keesokan harinya, satu forum mengenai penggunaan bahasa Malaysia yang melibatkan ahli panelnya Datuk S. Samy Vellu, Datuk Dr. Lim Kheng Yaik, Datuk Dr. Ling Liong Sik dan Encik Lee Lam Thye akan disiarkan di RTM. Pengerusinya ialah Profesor Tan Sri Awang Had Salleh.

Sementara itu, pameran buku pengajian tinggi akan dirasmikan oleh Menteri Pendidikan, Encik Anwar Ibrahim di Dewan Bahasa dan Pustaka pada pukul 11.00 pagi 12 Disember. Mailis pelancaran buku

cerpen Esso-Gapena yang diadakan sempena gerakan yang sama akan berlangsung di Hotel Hilton di sini pada 17 Disember.

Pada 18 Disember pula, Timbalan Menteri Perumahan dan Kerajaan Tempatan akan merasmikan forum pencapaian penulis Malaysia dalam sastera di Dewan Perhimpunan Cina di sini.

Hari terbuka Dewan Bahasa dan Pustaka bermula pada 19 Disember dan Grupemuisi Universiti Kebangsaan Malaysia menyambut ulangtahunnya yang ke-10 di Bangi. Menteri Pertanian, Datuk Sri Sanusi Junid akan merasmikannya.